

悼老丐

老丐吹簫博小貲，年來氣力已難支，忽傳餓斃松林裡，始悔從前未博施。

小姑背負洋娃娃

少女生來三四年，洋娃背上已糾纏，兒時未識擔當苦，解脫人知最可憐。

聞印度新總理夏士特死於俄國有感

二首

好在生平不作官，辛勤卻有幾朝歡，看他爲國傷心死，何似茅蓬獨善安。
天語無端報宿根，謂曾九度帝中原，驚心卻恐黃泉下，猶有鬼魂欲雪冤。

感謝類

敬謝馮大阿闍黎開示

隨住任何一點中，此身常覺坐春風，如拋小石投深海，蕩漾波紋十界通。

馮師目疾賦此謝罪

普賢何處著疑邪？累得師尊眼已花；也願精勤成五相，報恩分卻事如麻。

念恩

萬里恍如入室然，床頭咐囑許單傳，何時飛杵酬恩去，覺海中流泛普賢。

謝廖則如老居士代辦零星什物

先期預約緩張羅，隻口零星能幾何？晚照山城遊興好，煩翁替我市廛過。

謝山外諸君子眷念

行藏用捨保全真，豈是尋常圈套人，寄語良朋休念我，亡情卻與我相親。

昨夢東廚司命位有天母鏡五面疊降，今日蒙則老惠賜多珍

賦此謝之

鏡光五面下東廚，夢裡早蒙賜道腴，翁不欲先余欲後，佛前長供祝桑榆。

謝陳志新居士郵贈肉鬆

記得居停道義隆，別來千里又同風，爲憐邃谷無兼味，時遣綠衣餽肉鬆。

謝張相誠居士賜家製月餅

彷彿明星親手裁，雲門月餅自天來，即今何異菩提果，共仰秋高看幾回。

謝則老賜淡菜燉肉

清湯配合最高超，東海夫人特地邀，自遇奇緣鄰則老，無須陋巷弄篋瓢。

東海夫人：即淡菜之異名。

謝則老親餽肉湯

則老爲人最痛快，餽湯惟恐冷而敗，乘時淨用屢相催，愧我虛存蘆裡拜。

謝則老賜鄰兒糖果

鄰家兒女爲余忙，快遞詩文一兩章，滿面笑容歸興好，謝翁又贈數珠糖。

謝廖卓森老居士爲募閉關費用

只因一片婆心堅，遂感韋陀暗助緣，記得瑤函頒下日，將軍預告著長鞭。

聞天語枕上口占謝張澄基居士

只有澄基是可人，飛來天語大傳神，可憐荒卻福田裡，抽穗寥寥獨望君。

君字用孤雁出羣例。

謝則老代寄卅五佛相百零八尊于加城

凡聖距離曾幾何？得人傳渡便無多，如來欲向人間去，常借則翁掌上過。

謝密慧法師賜腐乳自謂霉深則味嘉

何日工夫得到家，沈寒徹骨放梅花，謝師開示修行理，腐乳霉深味自嘉。

謝張七娘賜親製中秋月餅

年年不改舊家風，佳節每承施意隆，善體天心親製餅，一輪明月在胸中。

謝張澄基兄繼續接濟

沈淪故國有誰親？海外知交顧愛頻，不是嬰孩長索乳，切知君外更無人。

謝梁燮桂居士施我關房費

阿育王興千萬塔，佛前種子路旁沙，謝君施我關房費，如意樹林已著花。

猥蒙馮師遙傳明印親筆題畫賦此謝恩

梵字親題妙義敷，銀鈎手印示楷模，攝機直達西天竺，萬里如聞方丈呼。

薄供謝罪於馮師

薄供虛名十萬錢，聊同阿育獻沙緣，個中無限精誠意，寶雨繽紛喻不全。

謝密慧法師賜五香乾脯

不愛嗟來苦自持，蒙恩卻肯轉相施，天廚妙味飄香處，正是茅蓬午供時。

謝則老預約派人領取嘉餼

如翁與我是神交，脫盡尋常舊禮教，預囑分甘休客氣，遣姑直取入郇庖。

謝廖卓森老居士遙寄魚丸乾

千里魚丸作脯遺，山遙味厚兩相宜，銀鈎細寫烹調法，惟恐羽書到達遲。

謝潘松妹居士遙寄魚肉

翻從佛法得相親，勝過家鄉自己人，念我寒山無美味，煎魚贈我選腰身。

謝無名氏遙寄供燈油

供油遙寄未標名，祈禱仍然推至誠，畢竟斯人何所願，如來悉見悉知情。

謝加城某女善信贈香

謝君遙贈數包香，即此誠心是道場；繞繚休嫌纒一縷，氣隨心願遍華藏。

謝則老端節後賜自烹海參

妙手烹調似寫詩，要當興致正來時，何須俗套循佳節，此意惟君與我知。

謝則老代售舊書二首

贏得一囊詩漸工，時添興趣賴吾翁，互憐傲骨同天賦，替我售書解困窮。
孤居自喜有青氈，不向豪門乞愛憐，休說久窮無志節，舊書猶可換金錢。

謝申書文女居士贈曆書

遮莫超時辰，感君情意真，愧常空過日，留贈有緣人。

謝劉銳之兄精校《灌頂論》

精神協助透文翰，苦語蒙施一片肝，後五百年王者得，休將此論等閒看。

蒙施一片肝：來示自云。

謝銳之兄精校拙著

智劍一杯酒，香江萬里施，法流奔覺海，長憶校書時。

謝則老索字贈親製大牢

記得書家鄭板橋，醜醜狗肉肯相邀，于今則老尤誠懇，力透珍饈上字條。

謝梁先生就詩寫景

醉後心情上小樓，吟來好景印雙眸，筆端先得山居意，畫影詩神悄地投。

謝沈家楨居士護愛

四海求知己，幾人存至誠，地球翻轉後，得遇沈家楨。

謝陳崑崖賜補藥於拙荊

推愛賢妻及拙荊，南天覺海更多情，自慚身獻如來後，一任禪婆死裏生。

謝梁劍夫兄遙施嘉餽

食德因緣仰仗天，冬陽護送朔風傳，
郇廚竟擾千山外，莫是西山一口禪。

謝梁端祥兄托本山友人殺雞相贈

菜根能壯出離心，肉食惟貪等獸禽，
況是殺生人造罪，我圖口腹豈知音？

謝加城諸護法

卅年相累強支持，貧窶卻圖法佈施，
此去不知誰可托，焉能豎指便安之。

承各邦友好紛施畫曆，獨喜日本僧正酒井真典所贈，宇治茶莊者，詩

以謝之 三首

寰球畫曆顯才華，特出心裁幾百家，
獨愛禪風傳日本，村姑碧澗治新茶。
春回暖氣釀桃花，閒在綠溪野老家，
欲請紅塵都市客，橋邊共飲幾杯茶。
清溪曲檻影橫斜，策杖過橋三兩家，
世外桃源禪味好，春風又坐野僧茶。

謝梁端祥兄趁冬季常寄嘉餽

郵包次第寄阿桑，萬疊關山路幾長，心熱不隨風雪冷，嘉餽卻喜久經霜。

謝梁端祥兄賜寄年糕油煎

正是嚴冬釀雪天，年糕寄罷又油煎，誰知熱愛千峯外，帶得春回嶺上先。

謝巴教授賜我禪書多種

羨翁早是過來人，不染雕蟲故紙塵，我愧書淫無簡擇，銘恩字字拜芳春。

伍八妹居士施油炸魚腰身，供之諦洛巴師前，並賦此謝之

神通未得與師同，吐出鮮魚入海中，且供尊前求普度，抱慚如骨髄喉嚨。

謝常住權

佛陀咐囑豈徒勞，接我龍王志更牢，久住何愁官不許，扶持法務有天曹。

謝廖松英遙贈嘉餽並囑勿謝

聞說病餘記憶差，卻蒙忽憶到山家，嘉餽遠寄頻叮囑，心照何須謝柬耶？

謝李俊承居士贈寒衣費

又遣綠衣贈范袍，蒙恩已覺債臺高，未知暖位緣生處，添得吾翁幾壽毫？

謝澄基函告好夢

萬里如聞痛哭聲，婆心一片露真誠，何期好夢蒙靈感，見我三身具月明。

謝李毓生居士贈日本特製大管自來水筆

倚馬萬言寫至誠，文章一氣喜呵成，自來墨是長江水，妙筆常傳大海情。

謝陳玉珍女居士倩人特製油炸魚

雪山孤處百魚無，羨煞王祥得鯉圖，蒙請專家精製贈，嘉餽恰似自天廚。

謝邱寶光兄

曾記雲箋言也溫，又蒙破鈔印書恩，寒山獨處無堪報，遙寄佛陀五百尊。

謹誌 大寶法王幸美加持之恩

（初見蒙以空行母佛冠戴我頭上，今又蒙由舊金山自動電話傳經。）

曾戴佛冠幾日前，又蒙電話結奇緣；非因高慢存孤獨，欲讓罪人得度先。

遠峯溪石白雲屯
路轉溪
回又却愧我拖泥長策
水西江未得一回名

上回字題加是如迴
健遊

慚愧類

自慚

自慚定慧工夫淺，每見身心過失多，有淚空悲三界苦，無功爭奈衆生何！

主婦忙

砧旁遣子理田莊，叮囑女兒快採桑，勞人口體猶精進，我愧無修看彼忙。

十愧吟

如來御璽蓋紅泥，囑我宏揚親筆題，愧煞有肩披不得，法衣塵鎖在川西。
記得齋僧學放茶，空行授記佛陀耶；花明柳暗菩提路，愧仰長天搔首嗟。
愧承三寶賜恩多，夢示將軍爲網羅，雪嶺參師纏萬貫，票頭都印有韋陀。

記得移文絕妙篇，北山騰笑已逃禪，于今我愧隨緣住，料得花岩也蹶然。
愧我離親淚水多，積來滾滾似黃河，于今親已飄流去，覺海曾添一滴麼？
愧我安懷并累妻，廿年幾日得眉齊？家書淚染閨中字，早早圓成次次題！
范袍薛責愧交加，托鉢何曾學出家，王難偶逢離亂苦，雖曾岩處未餐麻。
摩尼縱得落心田，爭似點金指石前，愧我揜關超十載，未還施主半文錢。
遠峯深谷白雲屯，路轉溪迴又一村，愧我拖泥長帶水，西江未得一回吞。
遠望長空似有邊，化城新到又茫然，一真人面知何處？愧對桃花共話禪。
現前裸露不常親，辜負本來面目真，善惡看來都可愧，偷心未死是癡人。

愧煞二首

愧煞披毛未易還，債台高築已如山，幾回欲罷未能罷，收拾淚痕又掩關。
人人爲我實扶持，粒粒盤餐縷縷絲，我爲人人空有願，精微緣起待誰知？

慚愧

但淨其心便現前，會超三界導人天，訓辭愧我難將護，一念何嘗互萬年。

前二句爲緣度母夢中訓辭

念佛

雪山苦鍊六年終，牛乳只嘗一小盅，愧我三餐圖口腹，明星夜夜自西東。

辜負

辜負阿娘四乳哺，難將六道同時度，自是神通未到家，明明驀直一條路。

先母生余後，別生二乳，在原乳上，近脅，三歲雖已斷乳，然按之猶有乳射出。

受施難

伸手受施易，替人懺罪難；業錢招業報，與彼兩分攤。

受施苦

布袋承施易，鐵丸憂慮長，牙虫人不見，苦痛自難當！

嘗大甜柑有愧

果已熟時紅潤膚，大柑甜到子都無；色空一味難融徹，我愧行功在半途。

趙炎午老居士以玄奘相喻愧吟七絕

劬勞萬里歷寒風，五印咸推四辯雄，白象榮歸充譯主，微乎小子敢言同？
喜領師恩了四空，眼光不與相宗同，千秋懸案曾調整，功罪任人談笑中。
著書難與古人同，多少誤傳已辯通，俗姓也呼陳氏子，結緣未限亞洲中。
出國嘉賓入國師，福田榮植孰如斯？自慚未免難民苦，豈似玄公值盛時！
天竺閉關廿五年，時間雖久愧無緣，有書曾向印人勸，騎象何曾破彼偏。
夢裡曾生腕上花，卻非學者逞才華，臨池偶寫過來語，自愧長修未到家。
大抵人崇古代師，同居一代互輕之，虛名後世品評日，應是金輪王轉時。

愧受嘉餽

用時容易做時艱，虛受施家德食頒，山麻未歷師尊苦，徒有虛名號閉關。

曠野尸陳心寧天曉鷄鳴
凝正宜眠餘音萬籟風外
拾恨搖籃雙眠生

正岩處士自題

山居類

己卯冬登貢噶雪山勝樂壇城閉關百日，詩紀始末卅二首各標小題。

登山

未曾積蓄買山錢，卻與名山慣有緣，勝樂今朝溫舊夢，峨眉話月是前年。

昔居廬山，嘗夢登貢噶雪山，爲世界第二高峯，風光與夢境無異。

暮到

無端萬籟鬧晴空，又惹寒鴉噪晚紅，火笑牛啼歸後飯，誰云寂寞在山中？

作客

作客山中興不賒，蠻婆笑打酥油茶，峨眉往事來眸底，冰雪庵僧磨豆花。

酥油和紅茶，入長竹筒，圓蓋穿長柄，如風箱。上下升降，和勻茶酥，謂之打茶。蜀人稱豆腐之未經包壓成塊者，曰豆花。

訪古

晴空藤杖畫西東，古蹟深藏何處通？蠻婦不知山外話，但將笑靨泛桃紅。

抒願

寒鴉數點爲香客，除卻松風只白石，願共彌陀結伴居，不將名姓噪京驛。

習定

芋火半爐煨淡月，匏瓜一個繫深山，心無散亂目無照，人自澄清境自閒。

輕安

不採靈芝不採精，憑空贏得一身輕，幾根傲慢娘生骨，也似絲綸繫小箏。

獻贓

似有還無作主張，隱微家賊最難防，直須追到山窮處，主賊相逢自獻贓。

禪觀

一角蝸廬天地寬，坦然自在不須觀，蝨來知癢寒來冷，難騙青州老布衫。

透光

心浮碧落風雲外，人在虛無飄杳間；喝破光明無一事，水還似水山還山。

睡光

天生一座水晶床，明月不來自映光，借問阿誰堪入寐？厥名勝照念頭王。

早眠

冰雪煮茶三兩盅，青燈獨飲倚爐紅，熱腸臥倒禪房暖，一覺醒來月正中。

晏起

曠野尸陳心寄天，曉雞唱罷正宜眠，餘音蕩漾風雲外，恰似搖籃嬰睡然。

夢湖

非關世亂隱深山，本是閑人樂得閒；夢裡西湖寇不到，獨邀明月過潭灣。

時日寇已陷杭州。

小寐

心絕思維若死灰，孤峯枯坐困迎來，幾聲寒欠驚山野，天籟喧傳午夢回。

父喪

一聲霹靂斷禪思，爲報奔喪已太遲，
萬里孤身風木慟！夢魂夜夜墓門馳。

補壁

破廟松風日日親，雪簷冰柱擬前身，
山僧未解寒來慣，爲補牆頭一角新。

久晴

雪山到處放光明，碧落無雲日日晴，
一抹斜陽纔過也，又篩竹影上窗楹。

童心

念罷眞言怒氣沖，挺身拔劍斬虛空，
回頭顧影呵呵笑，疑是童心落夢中。

念債

莫謂孟嘗債不收，從無佛果昧因由；野狐故事未親見，看取山前水牯牛。

念恩

面目廬山宛在茲，蓉城稚子也吾師，而今沒個還拳處，哭到羹牆轉笑癡。

曩侍諾師於廬山習心法，三日一報，厲色鞭策，吾侍之若嚴父！嗣侍色師於蓉城，好遊戲，常出足癢處呼搔，吾事之若嬌子。先後示寂，每憶必泣！「還拳」用禪門故事，謂報恩也。

嚙渡

淚滴雲岩幾尺泉，塵封願本壓年年，山靈入夢爲裝點，渡口喧呼已到船。

行拳

也是娘生七尺身，看來卻似一微塵，縱然打死雪山上，依舊無縫塔裡人。

雪山高寒，輕裘不暖，裸體行拳，惟以死當。「無縫塔」出禪門公案。

除夕

零星破廟兩三僧，隔嶺呼來共一燈，卻讓萬重山外客，夢魂搖落在親朋。

裸迎

是誰如去迎如來，忘卻丹霞已化灰，不挂一絲空過也，冷湫湫去冷湫回。

丹霞曾燒木佛。德格關房，例于每年正月十四裸體迎密勒祖師。「冷湫湫」見禪門公案。

出關

從來賊不到貧家，況是渾淪大木瓜，收檢不來偷不去，天無法蓋地無遮。

兒戲

何事拖泥走曲隈，且從舊路轉回來，牆彎突出一聲吓，侍女驚呼罵小孩。

侍女當面錯過。

安閒

捫蝨纔當紅日午，吟詩飛度夕陽斜，問君那得閒如許，遙指長空一片霞。

返寺

原住康沙加寺，距勝樂雪山二日程

好箇燕兒歸老家，不銜泥也不拈花，樑間自有舊時壘，細語如云蔑以加。

西康德格功德聚寺山居雜詠

凡六首

德格功德聚寺初春

二首

野犬迎春鬧曉鐘，東風刮雪露長松，邊荒冷淡山僧老，不讓陌頭花事濃。
一縷輕煙幾杵鐘，禪棲終古伴蒼松，人間乍有春光到，卻隔寒山數萬重。

熟睡

熟睡山樓入曉嘉，霜融喚起亂啼鴉，禪心仍舊棲泉石，夢境新添捧日霞。

蒙大寶法王授衣

勤苦未曾餐野麻，疏狂卻被法王誇，
降來一幅無縫布，教向何方躲閃耶？

別德格八幫寺

二首

疏庸只合處林間，野鳥岩花好往還，
此去孤雲誰惜別，離情都付與溪山。
紅籐挂轡欲相攀，問放林泉幾日間，
一笑脫身遙指點，試從煙外叩孤鷗。

我思

閒雲自在深山，竹影時篩窗間，
花好月圓人壽，我思長住禪關。

鑪霍閉關

煙霞倦看憩茅齋，豈是從天乞活埋，
一點蒲團平淡味，天公也沒法安排。

北天竺仙境關房即景

齊梢道樹安閒立，釀蜜名花趁鬧開，風解送香過寺去，山還含笑望雲回。

出關

展翼翻光鴉浴雨，迴腰散髮柳梳風，滿窗禪味誰關得，連柳望鴉出太空。

關房門每不揜

屋前小徑付青苔，明月無心過幾回，何事關房長不揜，總難得見一人來。

北天竺關房近景

數重道樹滿園花，曉鎖山嵐晚映霞，道是揜關何所揜，疏條細雨當窗紗。

北天竺雲水茅蓬即景 十三首

小蓬木架蓋黃茅，遠望羣峯眼底逃，何必樓臺標百尺，嶺頭屋腳比山高。
低頭峯髻似相探，腰腳羅裳披淺嵐，寂寞空山誰共話？憑窗欲與嶺攀談。
屋旁野菜不須栽，一任山羊嚙幾回，多少故都閒第宅，空餘老犬過花台。
飄杳清香淡欲無，四方峯擁一椽孤，夕陽鴉荷天邊去，山麓歸樵隔水呼。
茅舍無人到，優閑草自肥，花間穿小蝶，偷供鳥窺扉。

茅舍一椽德不孤，經旗佛塔影長鋪，開門便與雪山見，花木自成好畫圖。
山勢隨雲變，晴空展畫圖，近籬三兩竹，篩影過茅廬。

山脈已騎足上龍，碧天懷抱喜寬鬆，何當更對雪山頂，便欲飛登第一峯。

喜馬拉雅高峯，正對雲水茅蓬。

一到名山便閉關，更無家事必須還，途經佛刹尸林後，屋在山城雪嶺間。
遠望高樓幾處紅，青山綠畝自調融，豪門費盡經營力，只在茅蓬一笑中。
綠竹疏枝映遠山，潤流銀白幾迴環，誰家翠嶺松叢裡，一縷輕煙十里閒。

爲探林壑捲窗紗，疊嶂披雲戴晚霞，不是燒山連野火，那知高處有人家。
雲移山欲活，雨過翠如流，漫說茅蓬小，神同造化遊。

山神預告小茅蓬

坐熟窗前滿地桃，隔山神報小蓬茅，禪師舊舍且安住，孤鶴何須如許巢？

入關

不合時髦滿肚皮，關中獨處正相宜，直心快語入誰耳？且約青氈度四時。

曉起

二首

曉犬初相嬉，憑窗獨展眉，晨星三兩點，淡月西行遲。

夜色微餘旦氣清，替人眨眼數星明，孤峯獨宿誰呼起？破曉鴉啼第一聲。

雪山翫月

獨對人間第一峯，孤高不見野樵蹤，是誰邀我觀新月？滿谷風呼半嶺松！

夢回

深廣睡鄉五尺床，栩栩飛舞鬧壇場，更闌醒轉觀如夢，嶺麓雞啼曳籟長。

枕詩

酣臥坦然半死尸，山樓雨霽好眠時，床頭澀索錢都盡，睡足禪餘一枕詩。

殘臘

二首

寒月透疏條，空山老寂寥，冬殘不覺盡，何處幾聲簫？
高峯放眼寬，殘臘又將完，望到春華發，酥凝一體寒。

小婢

小婢低吟赴採薪，茂林無主樂天真，兼花帶草挑歸去，換取東家滿面春。

春歸

小築隱松間，不知春又還，牛蹄歸舊路，幾處正燒山。

板屋

板屋誰分一味恬，門張蛛網自莊嚴，有窗不納沾塵物，明月欲來便捲簾。

浪跡

江湖浪跡不孤身，宿月餐風到處親，偶住名山如故里，老僧呼我自家人。

玉蜀黍新苗出土

火龍光鬢遍山燒，蜀黍播完十數朝，昨夜春雷驚得雨，家家曉起看新苗。

即日

獨立驚飛鳥，經行觸網絲，雪山多變態，移步見新詩。

無題

長日無人到，簷垂珠網絲，春風常往返，催我竹枝詞。

茅舍

矮籬疏竹勝長城，雨打風吹總不驚，年事已超茅屋老，生機獨愛一身輕。

茅舍竹架走廊吹倒二首

房外走廊倒，也曾爲雨禱，此身滄海粟，且喜禾苗好。
從來不自焦，風雨早飄搖；將此小兒命，佛前學放嬌。

喜雨

昨夜沛然雨，貧農補屋忙；舒眉望蜀黍，恭謝一根香。

密勒祖師三種閉關亦嘗以身試之

尸林曾與鬼爲鄰，虎穴花岩兩度春，昔覩廬山眞面目，今依鷲嶺證前因。

雲水茅蓬內景

收攝華藏一小隅，重重帝網走蜘蛛，玄門相即原無礙，壁虎毛蟲共道腴。

幽居

環山多綠竹，中有短籬菊，竟日掩柴門，幽居小木屋。

用糶粬

交易憑官事事嚴，幽居簡樸不招嫌，華池甘露無須買，清水糶粬分外甜。

聞山歌

幽居竹木看晴陰，俗慮無由繫縛心，遮莫禪房常寂靜，山歌時復出松林。

即目

清風茅舍兩相宜，那得腥羶療蟻饑？屋角蛛絲無所獲，自懸蛻化一身皮。

即景

雪嶺留昏黃，微風向晚涼，禪床一座月，無意羨羲皇。

雨後山

泉石慣相親，山容浴雨新，得非含笑嶺，也愛看山人。

茅蓬雨景

一片昏天淡水敷，松山點染霧模糊，籬邊竹木偏工雅，誰寫天然米氏圖？

雲水茅蓬家風

閒觀雪嶺峯長白，更愛松山巒變姿，曉雨愁花興起早，孤壇供佛結跏遲。

翠竹

籬邊翠竹子生孫，不費園丁灌溉煩，也愛關房人不到，等閒長許話寒暄。

秋雲

秋雲似錦任天裁，卻是無心組織來，日日高空看不盡，綺霞又送夕陽回。

即事

數年難得幾朝親，曾記在家作客身，到此名山偏是主，叩門唯許兩三人。

板屋

晏居板屋極尋常，不用雕欄四面裝，卻有天然山水好，風來也解送花香。

茅蓬即景

誰嫌冷落在深林，遠處樵歌近處禽，聲色欲離還欲合，好從枯木作龍吟。

即景

萬綠村莊柳暗明，雲煙變幻惹人情，山樓卻有雄風起，吹得碧天一色清。

掃地

破落茅蓬鄰古廟，山塵慣赴清風召，新拈鐵片當灰箕，窮到孤懷時發笑。

山鳥

舊箋謝客已無痕，又寫紅條正貼軒，山鳥偷窺不識字，啄來黏粒似敲門。

即事

誰計揜關幾度春，花開花謝自紛陳，山前過往垂髻女，聞說今年已嫁人。

求雨 二首

既無菜圃又無田，雲水白衣小住禪，自愛茅廬晴得好，替人求雨也呼天！
山裡氣寒四月和，乘風正好放狂歌，卻嫌吹散烏雲去，時替菽田望雨過。

無題

天公放我一身閒，長醉詩禪自在關，到處時人忙不了，蒲團獨佔有名山。

松林小坐

獨坐松林品晚霞，清風留我數歸鴉，名山只愛閒人管，不問封疆屬那家。

蛛網四佈

一椽茅舍四山中，作客惟揮兩袖風，笑煞牆簷閒不得，蜘蛛到處佈行宮。

關房即景

舍外菽田田岸花，近山修竹是窗紗，雲封谷口人迷路，景物層層護小蝸。

喜得山中雨

深山得雨便成秋，打落炎威菽浪頭，汗滴江南騎馬客，何如野老趁風謳。

安隱茅蓬即景

水抱山環配遯肥，籬邊橘綠蓋薔薇，小樓終日無人到，閒倚欄杆看燕歸。

入山

求個出離人也無，高樓豈可用沙鋪，街頭久等誰相近，又入深山獨飲酬。

景物

天然景物解相陪，憐我孤居少客來；翻雨老鴉銜供去，剪煙勞燕得泥回。

五槐茅蓬即景

半邊街面半農場，中有茅蓬早隱藏，誰植五槐高丈六，我來無事再鋪張。

逢墟

山中貿易少心機，日用尋常也些微，滿谷風呼雲欲墮，紛紛趁向雨前歸。

五槐茅蓬即事

村頭市尾小禪房，天定德鄰解義方，瑣事人家兒女助，時蔬隔牖有農場。

綠畝

綠畝一疇連水間，晴開雨後好看山，頻添碧落新秋美，紅白紙鳶共往還。

雪山

雪山相對四時新，常綠林間意趣純，秋老冬殘人不覺，黃鸝一到又初春。

曝身窗前

晴天雨季最難逢，卅載關居久自封，惜物沾霉猶曝曬，霉存體內幾多重？

脫俗

縫衣補漏也司廚，只爲禪關獨自娛，非是百工咸善巧，羞因俗務與人俱。

即事

孤處看來是隻身，壇城圍繞有天神，嘉賓歐美攜妻子，也似周旋忙碌人。

買花供佛

二首

關居不復訪幽蘭，狹小茅蓬只佛壇，本地村姑容易採，買花原是我開端。
四季收售興不賒，窗前應接女如麻，猶嫌宿世良緣少，搜盡床頭趕買花。

盆景

雖然盆景喜玲瓏，邃谷幽蘭愛沐風，何必摘來成獨賞？廓然萬象入吾胸。

我之阿克攸(阿Q)精神

佛戒遵循未養貓，鄰家偶過不須邀，三聲許叫旋驅去，半學仁慈讓鼠逃。

即事

清風白日與寒泉，芋火泥爐已萬全，世上紛繁無用物，何關斗室小參禪。

飲茶

熱飲爐旁萬事空，新茶暖量勝春風，誰知野外千峯白，未及杯中幾片紅。

種花

種子東瀛友帶來，鄰家剩地代培栽，天公有意憐孤獨，近我窗前花早開。

鼠牙

鼠牙夜擾小書城，何處藏身聽不清，我慢休存人放下，且充家畜作貓聲。

烏鴉

茅庵報醒時，牛背立清姿，見天寬更好，飛上最高枝。

榨菜香

昔日岩居夢一場，雪山施主德難忘，雖然也羨長齋好，習氣猶存榨菜香。

早起

一日工夫在早晨，無邊事業費精神，睡鄉多是愚癡漢，世界全歸早起人。

竹製長篋以搔背癢

沈淪故國不須題，未遇麻姑久別妻，且倩工人修竹爪，每逢背癢遣長篋。

即事

游擊隊零工，山城多小童，逢人皆外護，老子其猶龍。

自畫

自畫樊籠斷本元，私心俗務便紛煩，鄰家有菊朝窗發，屋後何須闢小園？

窮居

鞋底洞穿口已開，襪頭倒用似新裁，窮居自喜多佳興，不是清貧那得哉？